

Pakatan: Seminggu untuk tukar tema 'Janji Ditepati'
FreeMalaysiaToday
By Jamilah Kamarudin
July 24, 2012

Slogan 'Janji Ditepati' itu tidak munasabah kerana ia bersifat peribadi untuk penyokong BN sahaja.

KUALA LUMPUR: Pakatan Rakyat memberi tempoh masa seminggu kepada kerajaan menukar tema Hari Merdeka kepada yang lain kerana ianya tidak menggambarkan kepentingan seluruh rakyat Malaysia.

Setiausaha Agung PAS Datuk Mustapa Ali berkata, slogan 'Janji Ditepati' itu tidak munasabah kerana ia bersifat peribadi untuk penyokong Barisan Nasional (BN) sahaja.

“Kami berikan tempoh seminggu. Kalau tidak kita akan cadang satu tema lain yang lebih sesuai untuk seluruh rakyat,” katanya.

Beliau berkata sedemikian selepas mengadakan mesyuarat mingguan Majlis Setiausaha Parti Pakatan Rakyat di Ibu Pejabat PAS di sini hari ini.

Turut hadir Bendahari PAS Dr Hatta Ramli, Ahli Jawatankuasa PAS Pusat Dr Dzulkefly Ahmad, Naib Presiden PKR Tian Chua dan Nurul Izzah Anwar, Pengerusi DAP Selangor Teresa Kok, Setiausaha Antarabangsa DAP Liew Chin Tong serta Setiausaha Politik Ketua Menteri Pulau Pinang Zairil Khir Johari.

Dr Dzulkefly berkata pihaknya khuatir jika 80 peratus rakyat tidak keluar menyambut Hari Merdeka disebabkan slogan itu.

Katanya, Pakatan yakin dengan adanya 48 peratus undi popular berpihak kepada mereka sudah cukup membuktikan kegagalan yang signifikan pada sambutan Hari Merdeka pada tahun ini.

Sementara itu, Tian Chua berkata cadangan slogan baru itu juga nanti tidak akan menggambarkan sokongan kepada Pakatan tetapi sebaliknya ia bersifat inklusif.

“Itu terpulang kepada rakyat sama ada mahu terima cadangan slogan Pakatan atau BN,” katanya.

Copyright (C) 2009-2012 MToday News Sdn. Bhd.

Source: <http://www.freemalaysiatoday.com/category/nation/2012/07/24/pakatan-beri-tempoh-seminggu-tukar-tema-janji-ditepati/>